

فدوة لجله عمري كله عشته أنواعه
وعندي اسمه أغلى كلمة واحسيناه
أوصيتي تالي العمر حسين يولادي الذخر

أنا من أم البنين اتعلمتها
حتى أطفالي بلبنها رضعتها
هالحياة امودتة.. ولا عفنها
وعالماتم من زغرها عودتها

أربعتهم قـدمتهم
من مثلها بس شبلها
رفعة للراس
كافي عباس

فاطمة يوم الحشر
بـجـفـه والله تفتخر

وكل ولد عابس أشوفه بحبه هايم
والشرف لي من يظل لحسين خادم
يريد لو شمعة أعلقه ابعرس جاسم
يقولوا عفية الربته ارباة الهواشم

لجل عمهم
والدتهم
نـزـف دمهم
علمتهم
هالانشامه
عالشهامه

ومن صبر رمله الصبر
ماخذ أسرار الأجر

ومن تمر سيرة علي الأكبر المهم
ومثل ضم ليلى إلى الأكبر أضمهم
أقول يولادي ترى الأولاد بامهم
ومن دعاها المستجاب أشد عزمهم

ويربهاها
من تودعه
وبرضاها
دمعة دمعة
أجمل احساس
تصير نبراس

سـلمت لله الأمر
وهذا والله النصر

ومن يمر طاري رضيعه الفاجع أمه
ألقى واحد يرسم ويبجي اعلى رسمه
وأقعد أفصل مصابه كلمة كلمة
يقول شوفي يمه عبدالله ابسهمه

چنه شايف دمه نازف وأنا أنعاه
وأمه بعده تهز مهده وتحچي وياه
هالمصيبة من تمر يشتل قلبي جمر

وأم وهب هذي المرة الحرة الأبية
طلعت اخلاف الولد غيرة وحمية
اشقدمت في كربلا لئن الزجية؟
بالعمود اتصيح حي اعلى المنية

وابعمدها وابولدها اتصيح مولاي
أعتذر لك تحت رجلك شنهني دنياي
ينفضخ راسي وأخر فدوة لحسين العمر

وفي المصايب سلوتي أم المصايب
چن اسمها وكربلا توأم عجائب
امطرزه أولادي بعبايتها كواكب
ومن صداها هالماتم والمواكب

هالعقيلة اشكد بطولة اشكد كرامات
في جفنها چن حزنها يصيح هيهات
لبوة وقفت في اليسر شوكة في عيون الشمر

فدوة لجله عمري كله عشته أنعاه
وعندي اسمه أغلى كلمة واحسيناه
أوصيتي تالي العمز حسين يولادي الذخر